

प्रादेशिक समाचार

आकाशवाणी जयपुर-अजमेर

दिनांक 10.09.2024

समय: 18.45 बजे

00000

- देश मांय साइबर अपराधां रो सामो करण सारु आवता पांच साल मांय पांच हजार साइबर कमांडो ने सिखावण दी जावेला।
- उपमुख्यमंत्री दिया कुमारी महिलावां ने मजबूत बणावण सारु समाज री सोच मांय बदलाव माथे जोर दीनो।
- चिकित्सा विभाग मायड़ां अर बच्चां री स्वास्थ्य सेवावां ने मजबूत बणावण सारु अन्तर्राष्ट्रीय संस्था सागे करार कीनो।
- प्रदेश मांय आज ई केई ठोड़ां बिरखा व्ही-आवता चार-पांच दिन चौमासा री बिरखा चालती रेहवण अर ऊगणी हलकां मांय कठे-कठे भारी बारिश रा आसार।

00000

केन्द्र सरकार साइबर अपराधां माथे काबू करण सारु आवता पांच साल मांय पांच हजार साइबर कमांडो ने सिखावण देवण री योजना बणा रही है। केन्द्रीय गृहमंत्री अमित शाह नई दिल्ली मांय भारतीय साइबर अपराध समन्वय केन्द्र रा पहला स्थापना दिवस रे मौके राखी ज्या जळसा मांय आ जाणकारी दीनी। वे कह्यो के साइबर हिफाजत बगैर देश री बरकत नी व्हे सके है। वे कह्यो के देश मांय बधता डिजिटल लेन-देन रे कारण साइबर हिफाजत ऊं जुडया लोगां री जिम्मेदारी बध गयी है। शाह कह्यो के तीन नुवा आपराधिक कानूनां मांय साइबर अपराध ऊं जुडी चुनौतियां रो सामो करण सारु जरूरी प्रावधान करी ज्या है। वे कह्यो के साइबर हिफाजत रा बारा मांय देशभर मांय जागरूकता अभियान चलायो जावेला।

00000

राष्ट्रीय पोषण महीना रा तैत जयपुर मांय आज सामुदायिक सम्मेलन राखी ज्यो। इण मांय उप मुख्यमंत्री दीया कुमारी कह्यो के महिलावां ने खुद रे पाण ऊबी करण सारु समाज ने सोच मांय बदलाव करणो पड़ेला। दीया कुमारी कह्यो के महिलावां ने नौकरी अर ऊंचा दर्जा री भणाई करावण मांय पिरवार री मदद घणी जरूरी व्हे है। कार्यक्रम पाछे खबरनवीसा सागे बातचीत करता थकां दीया कुमारी कह्यो के सरकार टाबरियां अर महिलावां ने मजबूत बणावण सारु लगातार जतन कर रही है। पोषण अभियान रा तैत सवाईमाधोपुर जिला रा आंगनबाडी केन्द्रां माथे आज पूरक पोषाहार थीम रा तहत गोद भराई रो कार्यक्रम राखी ज्यो। ई सागे ई महिलावां मांय बच्चां ने खुद रो दूध पावण रा बारा मांय जाग जगावण सारु ई कार्यक्रम राखी ज्यो। जैसलमेर मांय केन्द्रीय संचार ब्यूरो रा क्षेत्रीय कार्यालय जोधपुर री ओर ऊं पोषण ऊं जुडयो जागरूकता कार्यक्रम राखी ज्यो।

000

स्टेट ओपन स्कूल री दसवीं अर बारहवीं री ई साल री परीक्षा रा नतीजा रो ऐलाण कर दियो ज्यो है। शिक्षा मंत्री मदन दिलावर इण रो नतीजो ऑनलाइन तरीका ऊं जारी कीनो। दिलावर 12वीं रा इम्तिहान मांय अब्ल रेहवण वाळी प्रियंका पंवार ने फोन रे ज़रिए बात कर र बधाई दीनी। ई मौके राजस्थान स्टेट ओपन स्कूल रा निदेशक आशीष मोदी बतायो के स्टेट ओपन परीक्षा रा कोर्स री सामग्री ऑनलाइन तरीका ऊं मुफ्त मुहैया करायी ज्यी है। वे बतायो के साल मांय दो दफा व्हेवण वाळी ई परीक्षा देवण सारु न्यूनतम योग्यता या अधिकतम आयु सीमा री

बंदिश नी है। अर इण मांय महिलावां अर टाबरियां ने मुफ्त प्रवेश दियो जावे है। इण ऊं पैली शिक्षा मंत्री मदन दिलावर आज जयपुर मांय राजस्थान स्टेट ओपन स्कूल रा संदर्भ केन्द्रां रा संस्था प्रधानां री आमुखीकरण कार्यशाला मांय औपचारिक शिक्षा नी ले सक्था लोगां ने शिक्षा री मुख्य धारा ऊं जोड़बा सारू हर संभव कोशिश करण बाबत कह्यो। शिक्षा मंत्री कह्यो के स्टेट ओपन स्कूल मांय मौजूदा दौर मांय राष्ट्रीय मुक्त विद्यालय रो कोर्स चलायो जा रह्यो है जिण री ठौड़ प्रदेश रो खुद रो कोर्स तैयार करणो चाहिजे।

00000

36 देशां रा प्रशासनिक अहलकार स्मार्ट सिटी मिशन रा तहत जयपुर मांय कराया जा रह्या कामां ने आज देख्या। जयपुर स्मार्ट सिटी रा मुख्य कार्यकारी अधिकारी अभिषेक सुराणा आं अहलकारां ने स्मार्ट सिटी मिशन रा तहत कर्या जा रह्या कामां अर वां री खासियत रा बारा मांय जाणकारी दीनी। सुराणा परदेसी अहलकारां ने अभय कमाण्ड सेंटर रो दौरो ई करायो अर सेंटर रा कामाकज रा बारा मांय जाणकारी दीनी। सुराणा बतायो के भारतीय लोक प्रशासन संस्थान री ओर ऊं गोवा मांय चार ऊं 17 सितम्बर ताई चाल रह्या भारतीय तकनीकी अर आर्थिक सहयोग रा तहत 36 देशां रा प्रशासनिक अहलकारां ने शहर मांय स्मार्ट सिटी मिशन रा तैत कराया जा रह्या कामां री जाणकारी दीरीजी। ऐ अहलकार विधानसभा रा म्यूजियम रो ई दौरो कीनो।

000000

प्रदेश मांय मायड़ां अर बच्चां रा स्वास्थ्य ऊं जुड्या सुबीता और मजबूत बणावण रा मकसद ऊं चिकित्सा विभाग चिल्ड्रेन्स इन्वेस्टमेंट फण्ड फाउंडेशन (सीआईएफएफ) सागे करार कीनो है। विभाग री प्रमुख शासन सचिव गायत्री राठौड़ कह्यो के ई करार ऊं प्रदेश मांय मायड़ां अर बच्चां रा स्वास्थ्य ऊं जुड्या सुबीता और बेहतर बणावण मांय तकनीकी मदद मिलेला। वे कह्यो के सीआईएफएफ री मदद ऊं खून री कमी वाळी आस वाळी लुगाइयां रा बेहतर ईलाज रा तरीका ईजाद कर्या जावेला।

00000

राष्ट्रीय स्वास्थ्य मिशन री निदेशक डॉ. भारती दीक्षित कह्यो है के मानसिक बीमारियां रा कारणों री ठा कर र, यथासंभव रोकथाम अर सही ईलाज कर र आत्महत्या अर इण रा कारणों मांय कमी लायी जा सके है। डॉ. दीक्षित आज विश्व आत्महत्या रोकथाम दिवस रे मौके राखी ज्या कार्यक्रम मांय वीडियो कांफ्रेंस रे जरिये बोल रही ही। वे आत्महत्या मुक्त राजस्थान री शपथ दिराई अर ई बाबत जनता मांय जाग जगावण सारू बणायी ज्या पोस्टर अर नान्ही फिल्म रो विमोचन ई कीनो। ई मौके जनस्वास्थ्य निदेशक डॉ. रवि प्रकाश माथुर बतायो के ई साल विश्व आत्महत्या रोकथाम दिवस री थीम "चेंज द नरेटिव ऑन सुसाइड, स्टार्ट द कन्वर्सेशन" राखी ज्यी है। प्रदेश रा न्यारा-न्यारा जिलां मांय ई मुद्दा माथे कार्यक्रम राखी ज्या। मनोचिकित्सा रा प्रोफेसर डॉ. विनोद दडिया कोचिंग हब कोटा मांय आपहित्या री रोकथाम सारू काम लिया जा रह्या तरीकां री जाणकारी दीनी। वे कोचिंग ले रह्या विद्यार्थियां कानी ऊं आपहित्या करण री सोच रे दौरान व्यवहार मांय बदलाव अर इण रा मनोवैज्ञानिक कारणों अर आपहित्या ऊं पैली व्यवहार मांय बदलाव रा बारा मांय ई विगतवार चर्चा कीनी।

00000

किसान आयोग रा अध्यक्ष सीआर चौधरी घणी बिरखा रे कारण साखां मांय खराबा री शंका न ध्यान राखता थकां गिरदावरी बेगी करावण बाबत कह्यो है। वे आज भीलवाड़ा मांय राखी ज्या एक कार्यक्रम मांय बोल रह्या हा। चौधरी कह्यो के घणी बिरखा रे कारण फसल खराबा री गिरदावरी करावण सारू सरकार 1 सितम्बर ने हुकम दे दीनो है। वे कह्यो के सरकार साखा री बेगी कटाई रा बारा मांय ई बेगो ई सर्वे करावेला।

000000

प्रदेश मांय आज ई केई ठोडा बिरखा व्हेवण रा समाचार है। पाली मांय चौखो मेह बरस्यो जदके सवाईमाधोपुर मांय दोपहरां पाछे छांटो छिड़को व्ह्यो। कोटा जिला रा पीपलदा हलका मांय ईआरसीपी रा तैत कालीसिंध नदी माथे बणायी ज्या पहला बंधा 'नोनेरा एबरा' मांय पाणी आ रह्यो है। चूरू मांय ई आज करीब दो घंटा ताई व्ही झमाझम बिरखा ऊं केई ठोड़ां पाणी भर ग्यो। सिरोही जिला मांय ई रुक-रुक र तेज बारिश व्ही। लारला 24 घंटां मांय सिरोही जिला रा माउंट आबू अर सिरोही मांय 3-3 इंच अर रेवदर मांय 2 इंच बारिश दर्ज करीजी। बांसवाड़ा रा माही बजाज सागर बंधा रा 8 दरुजा खोल र पाणी निकाल्यो जा रह्यो है। टोंक जिला रा बीसलपुर बंधा रा ई 6 दरुजा खोल र पाणी निकाल्यो जा रह्यो है। हनुमानगढ़ जिला मांय ई

बरसात व्ही। नीमकाथाना मांय आज दोपहर करीब 1 घंटा तांई लगातार ज़ोरदार पाणी बरस्यो। चित्तौड़गढ़ मांय ई आज संवारे हल्की बौछारां पड़ी। मौसम विभाग प्रदेश मांय अवता चार-पांच दिन चौमासा री बिरखा चालती रेहवण अर ऊगणी हलका मांय कठे-कठे भारी बारिश रा आसार जताया है। उदयपुर मांय ई 3 दिन रा आंतरा पाछे आज करीब सवा घंटा तांई जोरदार मेह बरस्यो, जिण ऊं न्यारी-न्यारी ठोडा पाणी भर ग्यो।

000000

राज्य सरकार सीएनजी- पीएनजी आधारभूत संरचना ने बधावो देवण बाबत कोशिशों सुरू कर दीनी है। मुख्यमंत्री रा विशेष शासन सचिव संदेश नायक वीडियो कॉन्फ्रेंस रे मार्फत राखीजी मीटिंग मांय बतायो के राज्य सरकार प्रदेश मांय सीएनजी-पीएनजी सुबीतां रा बिना अड़चन विस्तार सुरू सीजीडी पॉलिसी बणा रही है। अतिरिक्त निदेशक, पेट्रोलियम अजय शर्मा बतायो के राज्य सरकार बजट मांय प्रदेश मांय एक लाख सीएनजी कनेक्शन जारी करण अर 2 हजार किलोमीटर लम्बी गैस पाईप लाईन बिछावण रो ऐलाण कीनो है।

00000

बाड़मेर जिला रा लीलसर धाम मांय आज भादवा रो मेळो भर्यो। मेळा मांय मोटी तादाद मांय आरे-सारे रा गांवां रा जातरू सिरकत कीनी। इण ऊं पैली काल रात व्ह्या जागरण मांय जसनाथी सिद्ध हैरतअंगेज तरीका ऊं अग्नि नृत्य पेश कीनो। इण रा तैत बळ-बळता अंगारां माथे अबाणा पग नृत्य कर्यो जावे है।

000

हनुमानगढ़ जिला र गोगामेड़ी मांय चाल रह्या मेळा मांय सिरकत करण वाळा जातरूआं रा सुबीता सारू रेलवे हनुमानगढ़-गोगामेड़ी-हनुमानगढ़ मेला स्पेशल गाड़ी चलायी है। उत्तर पश्चिम रेलवे रा मुख्य जन सम्पर्क अधिकारी कैप्टन शशि किरण बतायो के ऊं 13 सितंबर तांई चालण वाळी आ गाड़ी हनुमानगढ़ टाउन, टिब्बी, एलनाबाद अर नोहर टेशनां माथे ई रूकेला।

00000

गैर कानूनी तरीका ऊं सोनो लावण-ले-जावण रा अंतर्राष्ट्रीय नेटवर्क रा सदस्य मुनियाद अली खान ने आज संयुक्त अरब अमीरात ऊं भारत लायी ज्यो। जयपुर हवाई अड्डा ऊं वां ने एनआईए री टीम हिरासत मांय ले लीनो। ध्यानजोग है के साल 2020 मांय जयपुर रा अन्तर्राष्ट्रीय हवाई अड्डा माथे तस्करी कर र लायी ज्यो सोना री छड़ां जब्त करण रा मामला मांय मुनियाद अली ने खास आरोपित मानी ज्यो हो। एनआईए री अरज परां सीबीआई ई आरोपित रे खिलाफ इंटरपोल ऊं रैड नोटिस जारी करवायो हो।

00000